

中國書畫全集



盧輔聖主編

中國書畫全書

三

上海書畫出版社

圖書在版編目(CIP)數據

中國書畫全書2/盧輔聖主編——2版(修訂本).

——上海:上海書畫出版社, 2009.12

ISBN 978-7-80725-989-3

I. ①中… II. ①盧… III. ①漢字—書法—藝術

理論—中國—古代—文集 ②中國畫—繪畫理論—

中國—古代—文集 IV. ①J212.53

中國版本圖書館CIP數據核字(2009)第233110號

目錄

放翁題跋·陸游·一

廣川書跋·董道·三二一

廣川畫跋·董道·九一

東觀餘論·黃伯思·一二三

鶴山題跋·魏了翁·一七三

後村題跋·劉克莊·二〇八

海岳題跋·米芾·一二三四

寶章待訪錄·米芾·一二三六

書史·米芾·一二四二

海岳名言·米芾·二五五

畫史·米芾·二五七

德隅堂畫品·李廌·二六九

翰墨志·趙構·二七四

宣和書譜·內臣奉敕撰·二七七

宣和畫譜·內臣奉敕撰·三三三

思陵書畫記·周密·四〇五

雲烟過眼錄·周密·四〇八

志雅堂雜鈔·周密·四三一

續書譜·姜夔·四四五

寶真齋法書贊·岳珂·四四九

山水純全集·韓拙·六二七

聲畫集·孫紹遠·六三三

放翁題跋

宋 陸游撰

陸游·宋徽宗宣和七年（一二二五）生。宋寧宗嘉定三年（一二二〇）卒。字務觀。越州山陰人。放翁題跋有叢書集成本·津逮秘書本·今以後者斷句排印。

放翁題跋

目錄

卷之一

真廟賜馮侍中詩

高宗聖政草

高宗賜趙延康御書

高皇御書二則

今上皇帝賜包道成御書崇道庵額

跋尹耘師書劉隨州集

跋唐御覽詩

跋文武兩朝獻替記

跋吳禪師蒙泉銘

跋修心鑒

跋邵公濟詩

跋坐忘論

跋查元章書

跋高象先金丹訣二則

跋天隱子

跋造化權輿

放翁題跋

跋老子道德古文

跋已庵語

跋武威先生語錄

跋關著作行記

跋司馬子微餌松菊法

跋周茂叔通書

跋岑嘉州詩集

跋二賢像

跋山谷先生三榮集

跋硯錄香法

跋唐修撰手簡

跋蔡君謨帖

跋瘞鶴銘

跋西昆酬唱集

跋歷代陵名

跋溫庭筠詩集

跋王君儀待制易說

跋崔正言所書書法要訣

跋後山居士詩話

跋佛智與升老書

跋古柏圖

卷之二

跋中和院東坡帖

跋漢隸

跋晁百谷字叙

跋陵陽先生詩草

跋荆公詩

跋續集驗方

先左丞使遼語錄

跋朝制要覽

跋東坡問疾帖

跋東坡詩草

跋孫府君墓志銘

跋蘇魏公百韵詩

跋家藏造化權輿二則

跋三蘇遺文

跋兼山先生易說二則

跋鄭虞任昭君曲

跋傅正議至樂庵記

跋中興間氣集二則

跋齊驅集

跋柳柳州集二則

跋說苑

跋章氏辨誣錄

跋釣臺江公奏議

先太傅遺像

跋高康王墓志

跋半山集

跋李深之論事集

跋李莊簡公家書

跋之采先生稿

跋吳夢予詩編

跋松陵集三則

跋王仲言乞米詩

跋金匱集

跋韓非子

跋却掃編

跋彩選四則

跋陝西印章二則

跋詩稿

跋秘閣讀帖張長史率意帖

跋王深甫先生書簡

跋郭德誼墓志銘二則

跋郭德誼書

卷之三

跋後山居士長短句

跋蘇氏易傳

跋資暇集

跋法帖二則

跋蘭亭樂毅論并趙歧王帖

跋蔡肩吾所作蓮府君墓志銘

跋原隸

跋京本家語二則

跋李徂徠集

跋劉文老使君義居遺戒

跋無逸講義

跋東坡帖

跋東坡祭陳令舉文

跋劉凝之陳令舉騎牛圖

跋東坡七夕詞後

跋張監丞雲莊詩集

跋淵明集

跋陸史君廟籤

跋巴東集

跋呂侍講歲時雜記

跋許用晦丁卯集

跋李涪刊誤

跋歸去來白蓮社圖

跋釋氏通紀

跋毛仲益所藏蘭亭

跋魏先生草堂集

跋王輔嗣老子

跋前漢通用古字韻編

跋胡少汲小集

跋曉師顯應錄

跋范巨山家訓

跋張安國家問

跋坐忘論

跋唐盧肇集

跋居家雜儀

跋皇甫先生文集

跋南堂語

跋注心賦

跋朱新仲舍人自作墓志

跋黃魯直書

卷之四

跋蘭亭序

跋李少卿帖

跋樂毅論

跋李朝議帖

跋東方朔畫贊

跋李虞部與范忠宣公啓

跋范文正公書

跋東坡帖

跋盧衷父絕句

跋四三叔父文集

跋王右丞集

跋歐陽文忠公疏草

跋盤澗圖

跋為琛師書維摩經

跋東坡諫疏草

跋東坡代張文定上疏草

跋楊處士村居感興

跋朱氏易傳

跋晁以道書傳

跋嵩山景迂集

跋任德翁桀桴集

跋洪慶善帖

跋蒲郎中易老解

跋陸子疆家書

跋子聿所藏國史補

跋火井碑

跋韓晉公牛

跋畫橙

跋臨帖

跋米老畫

跋潘幽老帖

跋薊林帖

跋陳魯公所草親征詔

跋蔡忠懷送將歸賦

跋東坡書髓

跋范元卿舍人書陳公實長短句後

跋謝師厚書

跋雲丘詩集後

跋呂舍人九經堂詩

跋韓忠獻帖

跋高大卿家書

卷之五

跋諸晁書帖

跋南城吳氏社倉書樓詩文後

跋六一居士集古錄跋尾

跋林和靖詩集

跋米元暉書先左丞海岱樓詩

跋蘇丞相手澤

跋韓幹馬

跋義松

跋林和靖帖

跋東坡集

跋陶靖節文集

跋三近齋餘錄

跋望江麴君集

跋吳越備使二則

跋僧帖

跋卿師帖

跋松陵倡和集

跋潛虛

跋呂成叔和東坡尖叉韻雪詩

跋花間集二則

跋韓晉公字母牘

跋韓立道所藏蘭亭序

跋龔氏金花帖子

跋曾文清公奏議稿

跋曾文清公詩稿

跋魚計堂賦

跋徐待制詩稿

跋周益公詩卷

跋樊川集

跋周侍郎奏稿

跋周侍郎尋姊妹帖

跋鮑參軍文集

跋南華真經

跋與周監丞書

再跋皇甫先生文集後
跋漢文帝後元年三月詔
跋張魏公與劉察院帖
跋世父大夫詩稿

卷之六

跋魯直書大戴踐阼篇
跋唐昭宗賜錢武肅王鐵券文
跋司馬端衡畫傳燈圖
跋呂伯共書後
跋張敬夫書後
跋劉戒之東歸詩
跋秦淮海書
跋柳書蘇夫人墓志
跋朱希真所書雜鈔
跋為子通書詩卷後
跋呂文靖門銘
跋傅給事竹友詩稿
跋陳伯予所藏樂毅論
跋伯予所藏黃州兄帖
跋詹仲信所藏詩稿
跋陳伯予所藏蘭亭帖
跋坡谷帖
跋山谷書陰真君詩
跋呂尚書帖
跋傅給事帖
跋熊舍人四六後

跋臨汝志
跋尼光語錄
跋程正伯所藏山谷帖
跋張待制家傳

跋柳氏訓序

跋祠部集

跋消災頌

跋肇論

跋先楚公奏檢

跋宗元先生文集

跋韓子蒼語錄

跋孟浩然詩集三則

跋出疆行程

跋李衛公集

跋徐節孝語

跋趙渭南詩集

跋石鼓文辨

跋西昆酬唱集

跋兼山家學

跋淮海後集

跋張季長中庸辨擇

跋法書後

跋李太白詩

跋重廣字說

跋岩壑小集

跋王元澤論語孟子解

放翁題跋卷之一

宋 陸游撰

真廟賜馮侍中詩

某家舊藏孝嚴殿繪像。先正侍中馮公在焉。冠劍偉然。與太行黃河氣象相埒。每稽首嘆曰。侍中輔相兩朝。更天下大變而社稷奠安。夷狄懾服。鋤穰萬里。無犬吠之警。有以也夫。晚待罪新定。公之孫頤出示章聖皇帝賜詩。又以想見一時盛事。恨不生其時。俯伏沙堤旁窺望風采云。

高宗聖政草

某被命修光堯皇帝聖政。草創凡例。網羅放逸。雖寢食間未嘗置也。然不敢以稿留私篋。暇日偶追記得此。命兒輩錄之。隆興二年十月一日。左通直郎通判鎮江軍府事陸某記。

高宗賜趙延康御書

右知金壇縣趙君師愚錄高宗賜其大父延康公書及延康移偽楚書共為一編以示史官陸某。某曰。延康在宣和靖康間。聲望風采。震曜一時。及守苑丘。百戰禦狂虜。卒全其城。視唐代張巡許遠顏真卿皆過之。來朝行在。高皇蓋欲以左轄命之。議者謂宗室輔政非故事。遂止。方公之南徙也。謝表有云。臣本支百世。侍從三朝。又云。堅壁以保近畿。慨前功之俱廢。登壇而陪盛禮。懷曩遇以自憐。讀者悲之。某又嘗于公從孫師嚴有翼家見公建炎奏議稿一編。皆人所至難言者。不知此稿皆在鑒堂集中否。或可訪于有翼院中。以補逸遺。敢并以告。嘉泰癸亥歲三月丙申。臣某謹識。

高皇御書二

臣某少時與胡尚書之子杞同學于雲門山中。見高皇帝賜尚書御題扇曰。文物多師古。朝廷半老儒。蓋黃體也。與此手詔絕相類。後數年蒙收召。得面天顏。距今四十四年矣。伏讀實涕。不知所云。嘉

泰癸亥五月一日。史官臣陸某謹題。

又

臣某伏睹高皇帝御天下幾三十年。進用諫官御史皆出聖選。故往往職至相輔。其不合者猶為侍從乃去。如施公財任遺補即出守小郡。蓋無幾人。則其犯顏拂指。不撓于權幸。可以想見。而上之知人受盡言。有仁祖用范仲淹唐介之風矣。惜乎施公遽逝去。不及召用。於慮悲夫。開禧乙丑九月一日。故史官陸某謹書。

今上皇帝賜包道成御書崇道庵額

開禧某年某月甲子。皇帝親御翰墨書崇道庵三字賜妙行先生臣包道成以示故史官臣陸某將刻之石。具載歲月及被賜之由示天下後世。臣某竊聞臣道成實晉陵人。少學黃老之說。以劬身濟衆為事。寓迹都城三十餘年。築堂以居。凡以黃冠褐衣至者。靡不館之。往來千人。蓋嘗有神仙异人混于衆中。道成獨默識之而不言。會稽光孝觀故名乾明。天聖間章獻明肅皇后遣中使築之久壞不葺。道成談笑復其舊。凡都城橋梁道路皆力治之。費至緡錢百餘萬。建東岳廟吳山上。既成。又即其傍築室以奉真武。左江右湖。氣象雄麗。而道院屹立于廡外。鐘磬步虛之聲在雲霄間。都人為之心駭神竦。于是皇帝聞而昇之。故有扁榜之賜。臣某犬馬之年駸駸九十。獲在聖主仁壽域中。且嘗獲紬繹三朝金匱石室之藏。今雖篤老猶幸未病廢得以紀稀闊盛事。豈非幸哉。開禧二年歲在丙寅三月某日。太中大夫充寶謨閣待制致仕山陰縣開國子食邑五百戶賜紫金魚袋臣陸某昧死稽首再拜謹書。

跋尹耘師書劉隨州集

傭書人韓文持束紙支頭而睡。偶取視之。劉隨州集也。乃以百錢易之。手加裝褱。紹興二十五年正月八日。陸某記。

尹耘師耕。鄉里前輩。與九伯父及先君游。此集蓋其手抄云。紹熙

元年七月望。某再跋。

跋唐御覽詩

右唐御覽詩一卷。凡三十人。二百八十九首。元和學士令狐楚所集也。案盧綸墓碑云。元和中章武皇帝命侍臣采詩。第名家得三百一十篇。公之章句奏御者居十之一。今御覽所載綸詩正三十二篇。所謂居十之一者也。據此。則御覽為唐舊書不疑。然碑云三百一十篇而此纔二百八十九首。蓋散逸多矣。姑校定訛謬。以俟完本。御覽一名唐新詩。一名選集。一名元和御覽云。紹興乙亥十一月八日。吳郡陸某記。

跋文武兩朝獻替記

學者當以經綸天下自期。此書不可不見也。但傳本謬誤。幾不容讀。以它書尋繹之。得四五云。紹興丙子臘日。務觀題。

跋杲禪師蒙泉銘

右妙喜禪師為良上人所作蒙泉銘一首。往予嘗晨過鄭禹功博士。坐有僧焉。予年少氣豪。直據上坐。時方大雪寒甚。因從禹功索酒。連引徑醉。禹功指僧語予曰。此妙喜也。予亦不辭謝。方說詩論兵旁若無人。妙喜遂去。其後數年。予老于憂患志氣摧落。念昔之狂痛自悔責。然猶冀一見作禮懺悔。孰知此老遂弃世而去耶。雖然。良公蓋一世明眼衲子。不知予當時是即今是。試為下一轉語。隆興改元十一月五日。笠澤漁隱陸某書。

跋修心鑒

右高祖太傅公修心鑒一篇。初公生七年。家貧未就學。忽自作詩有神仙語。觀者驚焉。晚自號朝隱子。嘗退朝。見昇人行空中。足去地三尺許。邀與俱歸。則古仙人嵩山栖真施先生肩吾也。因受煉丹辟穀之術。尸解而去。然其術秘不傳。今惟此書尚存。某既刻版傳世。并以七歲吟及自贊附卷末。庶幾篤志方外之士讀之有所發焉。

亦公之遺意也。隆興二年七月二日。元孫某謹書。

跋邵公濟詩

先子入蜀時。與邵子文遇于長安同游興慶池。有詩倡酬。望得歡甚。夜讀公濟詩。超然高逸。恨未嘗得講世舊與文盟也。乾道元年五月十八日。笠澤漁隱陸某書。

跋坐忘論

司馬子微師體玄先生潘師正。體玄師升玄先生王遠知。升玄師貞白先生華陽隱居陶弘景。故體玄語子微曰。吾得陶隱居正一法。逮汝四世矣。乾道二年天慶節。借玉隆藏室本傳。漁隱子手記。

跋查元章書

李份事士大夫謹。以故得書帖多不可數。然閱其書。至不敢與他札偕藏者。元章吏部一人而已。份一吏耳。知敬元章如此。豈知元章仕于朝既不容。去而居幕府又不容。自引于數千里外赤甲白鹽之間乃少安。嗚呼。亦可嘆也夫。丙戌上元後三日。漁隱書。

跋高象先金丹訣

右玉隆萬壽觀本。序言有注解而不傳。亦不知序者為何人也。丙戌二月八日。務觀書。

又

國初有高象先。淳化中為三司戶部副使。少從戚同文學。與宗度許驥陳象與郭成範王礪滕涉齊名。不言其所終。亦不知其鄉里。恐即此人。然序言名先字象先。又似別一人。神仙隱顯不可必知。聊記之耳。辛亥炊熟日書。

跋天隱子

最後易簡漸門二說。非天隱子本語。他日錄本當去之。丙戌三月中休傳本于玉隆萬壽宮。漁隱。

東坡先生以為天隱子真司馬子微所著也。傳本後二十五年。紹熙庚

戊冬至日書。

跋造化權輿

先楚公著埤雅。多引是書。然未之見也。乾道三年孟夏十八日。傳自玉隆藏室。甫里陸某謹題。

跋老子道德古文

右漢嚴君平著道德經指歸古文。此經自唐開元以來獨傳明皇帝所解。故諸家盡廢。今世惟此本及貞觀中太史令傅奕所校者尚傳。而學者亦罕見也。予求之逾二十年乃盡得之。玉笈藏道書二千卷。以此為首。漁隱陸某題。乾道二年十月十日。

跋已庵語

乾道庚寅十月入蜀。舟過公安二聖。見祖珠長老得此書。珠自言南平軍人。得法于已庵云。

跋武威先生語錄

豐清敏公為中執法論事上前。曰司馬光呂公著皆忠賢。何為引赦復官。赦當及有罪耳。無罪何赦也。徽祖曰。光等變先帝法度。非罪乎。清敏公頓首曰。誠當變。無可罪者。方元符建中間衆正畢集于朝。天下喁喁想望太平。清敏公與陳忠肅公俱極諫官御史之選而所以言則有婉直之異。吾先大父楚公每以為二公之論皆不可廢。蓋忠肅似孟子說齊而清敏似伯夷諫周。其歸一也。今觀武威先生之論又甚似清敏。百世之下。志士仁人得此書讀之。當有太息流涕者矣。乾道七年立秋日。山陰陸某書。

跋關著作行記

著作關公出使破中。風采峻甚。仕者人人震栗。莫敢仰視。某以孤生起罪籍。萬里佐州。淺暗滯拙。自期且次去而關公獨厚遇之。舉酒賦詩。談臺閣舊事。忘其位之重也。公免歸之明年。某以事至卧龍山咸平寺。長老惠璉言。公往有行記。今將刻之石。因屬某書其

末。某曰。方關公之門可炙手時。此書伏不出。今公歸卧青城山中。賓客解散。形勢一變。而璉方刻其書為不朽計。嗟乎。足以愧士大夫矣。乾道七年七月七日。左奉議郎通判夔州軍州主管學事陸某謹識。

跋司馬子微餌松菊法

乾道初。予見昇人于豫章西山。得司馬子微餌松菊法。文字古奧。非妄庸所能附托。八年。又得別本于蜀青城山之丈人觀。齋戒手校。傳之同志。十二月六日。笠澤漁翁陸務觀于玉華樓。

跋周茂叔通書

濂溪之生也。世但以佳士許之耳。既死。蒲左轄作志。黃太史作詩。其稱述亦不過如此。向使無二程先生。後世豈知濂溪為大儒傳聖人之道者耶。以此知士之埋沒無聞者何可勝計。乾道壬辰十二月十五日。成都驛南窗書。

跋岑嘉州詩集

予自少時絕好岑嘉州詩。往在山中。每醉歸倚胡床睡。輒令兒曹誦之。至酒醒或睡熟乃已。嘗以為太白子美之後一人而已。今年自唐安別駕來攝犍為。既畫公像齋壁。又雜取世所傳公遺詩八十餘篇刻之。以傳知詩律者。不獨備此邦故事。亦平生素意也。乾道癸巳八月三日。山陰陸某務觀題。

跋二賢像

右孟貞曜歐陽率更二像皆唐人筆墨。北湖者。吳則禮子副也。無悔者。劉蕡無言也。最後實先君會稽公茶山先生曾文清公書。萬里羈旅。不自意全。撫卷流涕。乾道九年九月既望。刻石置漢嘉月榭上。山陰陸某識。

跋山谷先生三榮集

予集黃帖。得贈元師及王周彥三詩甚愛之。有黃淑者。家三榮。見

而笑曰。紹興中再刻本也。舊石方黨禁時已磨毀矣。乃出此卷曰。是舊石本。其筆力精勁蓋如此。因錄藏之。淳熙之元二月二日。務觀書。

跋硯錄香法

硯錄舊有本而亡之。香法蓋未之見。師房者。濟南衛昂也。娶婆婆先生崔德符女。晚官巴硤死焉。乾道辛卯冬予得此編于巫山縣。師房手鈔也。已腐敗不可讀。乃錄藏之。後三年淳熙之元二月三十日。蜀州漱玉南窗務觀書。

跋唐修撰手簡

某之曾外大父質肅唐公守并州。故給事中呂公實為幕客。質肅為人方嚴少許可或面折人。臨川王和甫同時在幕中。每言見唐公退輒汗滿握。然遇呂公特歡他客莫敢望也。淳熙元年某在蜀州得質肅仲子修撰公與給事手帖讀之。蓋元祐初修撰使河北給事為御史時也。書論黃河市易。辭指激烈。無一語及其私。與世俗責報父客至有違言者何其遠哉。修撰字君益。元祐中建議棄渠陽城。紹聖初坐貶團練副使。元符建中之間起守許昌。方治事。得報召蔡京。撫案憤咤。即日疽發背卒。某不及拜公而先夫人為言公大節如此。敢并記之。以遺給事之孫教授君云。七月二十三日。山陰陸某謹書。

跋蔡君謨帖

近歲蘇黃米芾書盛行。前輩如李西臺宋宣獻蔡君謨蘇才翁兄弟書皆廢。此兩軸君謨真行草隸皆備。石在仙井。可寶也。淳熙元年九月八日。蜀州手裝。

跋瘞鶴銘

瘞鶴銘。予親至焦山摹之。止有此耳。殘璋斷缺。當以真為貴。豈在多耶。淳熙之元九月一日。蜀州重裝。

跋西昆酬唱集

通直郎張玠。河陽人。呂汲公家外甥。藏書甚富。淳熙二年正月八日夜讀此集。燈架忽仆壞書。時傳畢方一日。豈歐尹諸人亦有靈耶。記之為異時一笑。

跋歷代陵名

三榮守送來。近世士大夫所至喜刻書版而略不校讎。錯本書散滿天下。更誤學者。不如不刻之愈也。可以一嘆。淳熙乙未立冬。可齋書。

跋溫庭筠詩集

先君舊藏此集。以華清宮詩冠篇首。其中有早行詩所謂鷄聲茆店月人迹板橋霜者久已墜失。得此集于蜀中則不復見早行詩矣。感嘆不能自己。淳熙丙申重陽日。某識。

跋王君儀待制易說

王公易學雖出于葆光張先生。然得于心者多矣。建炎間胡騎在錢唐。明越俱陷。王公端居于嚴。曰虜決不至此。且狼狽而歸。自此窮天地不復渡江矣。其妙于易數蓋如此。淳熙丁酉元日。山陰陸某書于錦官閣下。

跋崔正言所書書法要訣

德符詩名一代。書則未之見也。觀此編中字瘦健有神采。亦類其詩。乃知前輩未易以一技名也。戊戌重午。務觀書。

跋後山居士詩話

談叢詩話皆可疑。談叢尚恐少時所作。詩話決非也。意者後山嘗有詩話而亡之。妄人竊其名為此書耳。後山二子豐登。登過江為會稽曹官。李鄴降虜。登亦被驅以北。悲夫。淳熙戊戌十月二十四日。可齋。

跋佛智與升老書

此一編。佛智禪師與其法子寒岩升公書也。議論超卓。殆非世儒所

及三復嘆仰。淳熙己亥三月九日。建安雙清堂書。

跋古柏圖

此圖吾家舊藏。予居成都七年。屢至漢昭烈惠陵。此柏在陵旁廟中。忠武侯室之南。所謂先主武侯同閼官者。與此略無小異。則畫工亦當時名手也。淳熙六年龍集己亥六月一日。陸某識。

放翁題跋卷之二

跋中和院東坡帖

此一卷。皆蘇仲虎尚書所藏。鑒定精審。無一帖可疑者。刻石在成都大聖慈寺中和勝相院。淳熙六年六月十七日。陸務觀題。

跋漢隸

漢隸十四卷。皆中原及吳蜀真刻。淳熙己亥集于建安公署。友人莆陽方士繇伯謨親視裝褱。故無一字差謬者。六月二十一日。山陰陸某書。

跋晁百谷字叙

名者士所願也。而或懼太早何哉。吾測之審矣。少而得名。我不能不矜。人不能不忌。以滿假之心。來譏謔之口。幾何其不顧也。吾元歸年甫二十。筆力扛鼎。不患無名。患太早耳。雖然。洪道方力張其名。而吾獨欲其退避掩覆。元歸未必樂也。異時出入朝廷。更歷世故。會當思吾言也夫。淳熙庚子二月三日。山陰陸某書。

跋陵陽先生詩草

右陵陽先生韓子蒼詩草一卷。得之其孫籍。先生詩擅天下。然反覆塗乙。又歷疏語所從來。其嚴如此。可以為後輩法矣。予聞先生詩成。既以予人。久或累月。遠或千里。復追取更定。無毫髮恨乃止。則此草亦未必皆定本也。大歇庵詩一章。徐師川作。而先生手錄之。亦足見其無昔人爭名之病矣。故附見卷中。淳熙庚子四月二

十二日。笠澤陸某書。

跋荆公詩

右荆公手書詩一卷。前六首贈黃慶基。後七首贈鄧鑄。石刻皆在臨川。淳熙七年七月十七日。陸某謹題。

跋續集驗方

予家自唐丞相宣公在忠州時著陸氏集驗方。故家世喜方書。予宦游四方。所獲亦以百計。擇其尤可傳者。號陸氏續集驗方。刻之江西倉司民為心齋。淳熙庚子十一月望日。吳郡陸某謹書。

先左丞使遼語錄

右先楚公使遼錄一卷。三十八伯父手書。伯父自幼被疾。以左手書。然筆力清健如此。平生凡鈔書至數十百卷云。淳熙八年四月五日。某謹識。

跋朝制要覽

先君會稽公晚歲喜觀此書。間為子弟講論因革。率至夜分。先君捐館舍三十有四年。統得此于故廬。伏讀悲哽。敬識卷末。淳熙八年龍集辛丑十一月二十五日。山陰陸某書。

跋東坡問疾帖

東坡先生憂其親黨之疾委曲詳盡如此。則愛君憂國之際可知矣。其曰勿使常醫弄疾。天下之至言。讀之使人感嘆彌日。淳熙九年五月乙未。甬里陸某書。

跋東坡詩草

東坡此詩云。清吟雜夢寐。得句旋已忘。固已奇矣。晚謫惠州。復出一聯云。春江有佳句。我醉墮渺莽。則又加于少作一等。近世詩人老而益嚴蓋未有如東坡者也。學者或以易心讀之何哉。淳熙九年五月二十六日。玉局祠吏陸某書于鏡湖下鷗亭。

跋孫府君墓志銘

方五代割裂時。自一郡以上。非其國子弟則大將功臣也。士大夫仕為令掾者已為達官。錢氏土境尤盛而孫公至專城。蓋其國顯人也。觀杜公所述亦誠有以得之矣。淳熙壬寅立秋日。甫里陸某。

跋蘇魏公百韵詩

右首一卷丞相魏公謝事歸第且八十時所作也。蘇端明賀趙清獻公得謝啓云。念平生之百為。一無可恨。某于魏公亦云。淳熙壬寅立秋日。吳郡陸某謹識。

跋家藏造化權輿

右造化權輿六卷。楚公舊藏。有九伯父大觀中題字。淳熙壬寅得之故第廢紙中。用別本讎校而闕其不可知者。兩本俱通者亦具疏其下。六月四日。山陰陸某謹記。

後十有四年慶元元年八月十二日重校。凡三日而畢。時年七十一。

跋三蘇遺文

此書蜀郡呂商隱周輔所編。周輔入朝為史官。得唐安守以歸。未至家暴卒。良可悲也。淳熙十一年正月十一日。務觀識。

跋兼山先生易說

郭立之從程先生游最久。程先生病革。猶與立之有問答語著于語錄。而尹彥明獨謂立之自黨論起即與程先生絕。死亦不吊祭。蓋愛憎之論也。立之子雍字子和。屏居峽中。屢聘不起。亦著易說。得其家學。蓋程氏易學立之父子實傳之。淳熙甲辰二月三十日。甫里陸務觀云。

後六年。得謝昌國所贈頤正先生辨尹公說。乃知予此言粗合也。頤正即雍也。己酉八月二十八日某書。

跋鄭虞任昭君曲

自張文潛下世。樂府幾絕。吾友鄭虞任作昭君曲。如羊車春草空芊芊及重瞳光射搔頭偏之類。文潛殆不死也。但願夕烽長不驚甘泉。

妾身勝在君王前。能道昭君意中事者。淳熙甲辰三月二十三日。甫里陸某書。

跋傅正議至樂庵記

伏波將軍困于壺頭。曳病足土室中以望夷賊。左右哀之。莫不為流涕。定遠侯在西域三十年。年老思土。上書自言願生入玉門關。詞指甚哀。彼封侯富貴矣。然戚戚無聊乃如此。其他盈滿脆脆畏禍憂誅願為布衣不可得者又何可勝嘆。然則富貴果不如貧賤之樂耶。曰。此自富貴者言之耳。貧賤之士。仕則無路。處則無食。自非有道君子其憂又有甚者矣。正議傅公在學校二十年。聲震京師。同舍生去為公卿者袂相屬。而公始僅得一第。既仕矣。適時艱難。妄男子往往起闖巷取美官。公又弃不用。則亦何自樂哉。及讀所作至樂庵記。自道其胸中恢疏磊落。所以樂而忘憂者。文辭辯麗動人。有列禦寇莊周之遺風。然後知公蓋有道者。或曰。使天以富貴易公之樂。公其許之乎。予曰。公所以處貧賤者。則其所以處富貴也。顏回之簞瓢周公之衮綉一也。觀斯文者蓋以是求之。淳熙十一年七月十六日。山陰陸某謹書。

跋中興間氣集

高適字仲武。此乃名仲武。非適也。評品多妄。蓋淺丈夫耳。其書乃傳至今。天下事出于幸不幸固多如此。可以一嘆。淳熙甲辰八月二十九日。放翁書。

高適字仲武。此集所謂高仲武。乃別一人名仲武。非適也。議論凡鄙。與近世宋百家詩中小序可相甲乙。唐人深于詩者多而此等議論乃傳至今。事固有幸不幸也。然所載多佳句。亦不可以所托非其人而廢之。

跋齊驅集

此集刻版于宣和三年。方是時黨禁猶未解。文士蓋僅有見者。故本

多誤。然好事者冒法刻之亦奇矣。淳熙甲辰重午日。陸務觀書。

跋柳州集

此一卷集外文。其中多後人妄取他人之文冒柳州之名者。聊且哀類于此。子京。

右三十一字。宋景文公手書。藏其從孫鼓家。然所謂集外文者。今往往分入卷中矣。淳熙乙巳五月十七日。務觀校畢。

跋說苑

李德芻云。館中說苑二十卷而闕反質一卷。曾鞏乃分修文為上下以足二十卷。後高麗進一卷遂足。淳熙乙巳十月六日。務觀書。

跋章氏辨誣錄

徽宗皇帝盛德大度。自秦漢以來人主莫能及者。尤在友愛蔡王寬貸章惇而史臣不能發明。可為太息。淳熙丙午十月望。陸某謹題。

跋釣臺江公奏議

某乾道庚寅夏得此書于臨安。後十有七年蒙恩守桐廬。訪其家復得三表及贈告墓志因并刻之。以致平生尊仰之意。淳熙十三年十一月十有六日。笠澤陸某書。

先太傅遺像

先太傅皇祐中以吏部郎中直昭文館。自會稽移守新定。期年請老。得分司西京以歸。迨今百四十年而某自奉祠玉局起為是邦。實繼遺躅。于是知建德縣事蘇君林以父老之請。築祠宇于兜率佛寺。淳熙十四年春正月丙辰。備車旗儀物大合樂奉遺像于祠。且以公自贊道帽羽服像刻之堅珉。慰邦人無窮之思。朝隱子蓋公自號云。元孫朝請大夫權知嚴州軍州事陸某謹書。

跋高康王墓志

王歧公文章閎麗有西漢風。而宋常山公書法森嚴實傳鍾張古學。方裕陵致孝實慈極天下養。故并命兩公彰顯高氏先王功烈以詔萬世。

可以為寵光矣。中更亂離。而墨本寶藏如新。殆有神物護持云。淳熙十四年二月三日。笠農陸某謹識。

跋半山集

右半山集二卷。皆荆公晚歸金陵後所作詩也。丹陽陳輔之嘗編纂刻本于金陵學舍。今亡矣。淳熙戊申上巳日。笠澤陸某書。

跋李深之論事集

唐丞相司空李公深之論事集。有兩本。其一本七卷。無序。其一本一卷。史官蔣偕作序。然以序考之。則偕所序蓋七卷者也。淳熙戊申四月十九日。笠澤陸某識。

跋李莊簡公家書

李文參政罷政歸鄉里。時某年二十矣。時時來訪先君。劇談終日。每言秦氏。必曰咸陽。憤切慨慷。形于色辭。一日平旦來共飯。謂先君曰。聞趙相過嶺。悲憂出涕。僕不然。謫命下。青鞋布襪行矣。豈能作兒女態耶。方言此時。目如炬。聲如鐘。其英偉剛毅之氣使人興起。後四十年。偶讀公家書。雖徙海表。氣不少衰。叮嚀訓戒之語。皆足垂範百世。猶想見其道青鞋布襪時也。淳熙戊申五月己未。笠澤陸某題。

跋之罕先生稿

肩吾。文忠公四世孫。博學工文章。與予蓋莫逆也。晚來行在。諸公貴人頗知之。欲引置要津。有毀之者。肩吾既不偶。乃調桂陽令去。客姑蘇。未系舟。暴疾一夕死。哀哉。嘉父。健為人。肩吾沒後數年。始以進士起家。淳熙戊申秋社日。放翁書。

跋吳夢予詩編

山澤之氣為雲。降而為雨。勾者伸。秀者實。此雲之見于用者也。子嘗見早歲之雲乎。嵯峨突兀。起為奇峰。足以悅人之目而不見于用。此雲之不幸也。君子之學。蓋將堯舜其君民。若乃放逐憊

悴。娛悲舒憂。為風為騷。亦文之不幸也。吾友吳夢予。橐其歌詩數百篇于天下名卿賢大夫之主斯文盟者翕然嘆譽之。末以示余。余愀然曰。子之文。其工可悲。其不幸可吊。年益老。身益窮。後世將曰是窮人之工于歌詩者。計吾吳君之情亦豈樂受此名哉。余請廣其志曰。窮當益堅。老當益壯。丈夫益棺事始定。君子之學。堯舜其君民。余之所望于朋友也。娛悲舒憂。為風為騷而已。豈余之所望于朋友哉。淳熙十五年十一月二十六日。甫里陸某書。

跋松陵集三

淳熙十六年四月二十六日。車駕幸景靈宮。予以禮部郎兼膳部檢察賜公卿食。訖事作假。會陵陽韓籍寄此集來。云東都舊本也。欣然讀之。時寓磚街巷街南小宅之南樓。山陰陸某務觀手識。此集蔡景繁舊物。復嘗歸韓子蒼。子蒼之孫籍以遺予。蓋百年前本也。

景繁元豐中嘗為開封推官。此所題開封南司者是也。景繁二子居厚居易。此題居厚者其長也。景繁臨川人而韓子蒼居臨川故得此書。務觀手記。

跋王仲言乞米詩

仲言貸米。本自欲就魯肅輩人。而良齋又戒以勿取陶胡奴米。仲言治己可謂嚴而良齋告之亦可謂忠矣。數年來仲言以貧甚客長安中。豪子資給殊厚。今春忽捨去。主人叩首乞少留不可。豈獨能踐初言。亦不負良齋期待矣。淳熙己酉四月二十七日。陸某務觀書。

跋金匱集

飛卿南鄉子八闕語意工妙。殆可追配劉夢得竹枝。信一時杰作也。淳熙己酉立秋觀于國史院直廬。是日風雨桐葉滿庭。放翁書。

跋韓非子

右韓非子一卷。紹興丁卯先君年六十時傳吳域才老本。後四十有二

年淳熙己酉某重裝而藏之。時年六十有五。十月九日。史院東閣手識。

跋却掃編

此書之作。孰立猶少年。故大抵無紹興以後事。淳熙己酉十一月十日書于儀曹直廬。

跋彩選

紹興甲戌七月三日。子宅過此。彩選畢景。丙子二月五日。同季思訪務觀雲門山草堂。復為此戲。子宅記。

紹興十九年正月十有七日。友人王仲言父自京江來以是書為贈。醕醢庵記。

官制左右丞不為平章事。自侍郎拜者皆躡遷尚書。此書蓋失之。子宅季思下世忽已數年。予今年六十有七。覽此太息。然予方從事金丹。丹成。長生不死直餘事耳。後五百年過雲門草堂故趾。思昔作彩戲豈非夢耶。紹興元年上半年。放翁書。去子宅題字時三十年矣。

跋陝西印章

紹熙庚戌正月十九日。夜閱故書得此。追思在山南時已二十年。同幕惟周元吉閻才元章德茂張季長及余五人尚亡恙爾。拊卷累歎。放翁題。

又十有五年。當嘉泰之四年。歲在甲子。因暴書再觀。則元吉才元德茂又皆物故數年矣。季長在蜀。累歲不得書。存亡有不可知者。而予年已八十。感嘆不能已。八月十六日。務觀書。

跋詩稿

此子丙戌以前詩二十之一也。及在嚴州再編。又去十之九。然此殘稿終亦惜之。乃以付子聿。紹熙改元立夏日書。

跋秘閣續帖張長史率意帖